

長劫難盡苦難堪，如是鬼苦攝我心，佛慈令轉彌陀佛。地獄八寒八熱苦，長劫難盡苦難堪，如是彼苦攝我心，佛慈令轉毗盧佛。自心瞋心獄衆現，證瞋性空喜金剛，三續起滅得同時，無間相應我啟請。自心慢心天人現，證慢性空密集尊，三續起滅得同時，無間相應我啟請。自心貪心鬼衆現，證貪性空大幻網，三續起滅得同時，無間相應我啟請。自心疑心修羅現，證疑性空大威德，三續起滅得同時，無間相應我啟請。自心癡心畜衆現，證癡性空勝樂尊，三續起滅得同時，無間相應我啟請。愛別離時父母苦，我心充彼作正念，生無常心皈依佛，乃至能忍于法愛。怨憎會時父母苦，我心充彼作正念，生出離心皈依法，乃至能忍於法怨。五陰熾盛父母苦，我心充彼作正念，轉成五智皈依僧，乃至能忍于無生。生老病死父母苦，我心充彼作正念，如佛四門之故事，乃至出家證菩提。何人苦修未證者？我身現彼作加持；何人嫌法難成者？我身現彼作保證；何人怖畏魔障者？我身現彼作調伏；何人將遭中斷者？我身現彼作回遮。刀兵水火八難時，我身現彼作救主，由得救時皈依佛，佛化身悲充我心。一切惡果成熟時，

我身現彼作救主，由得救時皈依佛，佛化身悲充我心。親友財物捨棄時，我身現彼作救主，由得救時皈依佛，佛化身悲充我心。中陰孤自飄零時，我身現彼作救主，由得救時皈依佛，佛化身悲充我心，親見閻羅宮殿時，我身現彼作救主，由得救時皈依佛，佛化身悲充我心。佛心充滿于我心，我心充滿于衆心；願衆充滿于我心，我心復充於佛心。佛心充我我具智，我心入衆以運悲；衆心入我能生信，由此信心得成佛。我雖未及常見佛，佛則常常能見我；衆雖未能普生信，我則普遍悲憫衆。悲心信心兩契合，願我與衆同成佛；心佛衆生一體中，願我與衆同證入。勤緣衆苦我生悲，同體大悲出化身，化身六通與十力，願我具足以度衆！勤緣佛慧我生智，無緣大悲出化身，化身五智卅二應，願我具足以度衆！智佛悲衆相應處，無邊方便我心生，勤修方便運于衆，令衆成佛佛願滿。于佛前報衆生恩，于衆生前報佛恩；如此輾轉勝事業，願我具足壽自在。以無死力常運轉，以無生力常清淨，以無住力常解脫，生佛心前我啟請。我身為佛而服役，我心爲衆而祈禱；佛願無盡我無盡，衆未度盡我不死。菩提本性無聖凡，

亦無行者亦無緣，亦無來去與相續，本來清淨大圓滿。亦無度凡之聖者，亦無入聖之凡人，亦無牽合之行者，勝義菩提離造作。有無心而自發者，毋發心而反執心；如是勝義菩提心，願衆任運自安住。佛入我身非是入，我入衆心非是出；法流周轉無來去，法光變幻無窮盡。豎通三世橫十方，法身圓滿即我身；法身標幟無盡藏，願爲衆現我啟請。

癸巳七月初十造于北天竺五槐茅蓬

教義通攝舉隅頌

敬禮

本師釋迦牟尼佛前

敬禮大牟尼，皈依大法王。三時十二分，一切佛所說，前前通後後，後後攝前前。無分小與大，惟是一圓教；殊勝微妙法，出生一切佛。爲利諸行者，舉例言通攝，令不生顛倒，圓滿能受持，不執此破彼。金剛座前書，敬請大加被。教海無量義，非短時可集；謹就因地中，出離心言通，次就大圓滿，果法上言攝。

出離屬小乘，然爲法基礎；是故普賢品，亦讚頭陀行。一切法門中，皈依爲最初；于世不厭離，決非真皈依。爲令他亦離，故生度他心；非遷就于彼，彼此陷泥犁。故欲發大心，亦基於出離；出離心堅固，方能行六度。厭離財寶故，即能行佈施；若與彼同貪，則不能佈施。

出離心堅固，方能言持戒；與俗人相處，言行皆造罪。出離心堅固，則能忍大辱；不離而忍辱，何異無恥者？出離心堅固，方能言精進；不離諸俗事，何暇以精進？出離心堅固，方能言禪定；奔走散亂中，皆由不出離。出離心堅固，方能言般若；日處八風中，焉能悟空性？如上通大乘，但就大略言。禪宗稱最上，然亦必出離。二祖斷臂時，豈有世間念？古德持話頭，如彼喪考妣；一時若不在，如同彼死人。南泉三十年，不曾出池陽；慧忠四十年；不曾出黨谷。此中例甚多，
（可讀拙所撰《禪海之塔燈》。） 密宗即生成，人歲能幾何？盡其畢生力，尚恐其不足；何能雜俗事，轉自成蹊跬！生起重佛慢，為離衆生見。圓滿次第者，若論勝樂法：幻身離俗身，氣功離俗語，夢光離俗意，頗瓦與中陰，徹底離俗世。若論密集法，五次第之中：第一身遠離，第二語遠離，第三意遠離，明明已標出，第四幻身者，仍離身語淨，第五光明者，仍是意離淨；前三離為粗，後二離更淨。如上通密乘，亦就大略言。若論通大印；離貪則能樂，離瞋則自明，離癡則無念，

能離無所離，方真入大印；專一即離亂，離戲即離印，一味則離異，無修則離功。若論大圓滿：明悟法性者，即離於俗慮；悟境日進者，則離於粗悟；自心進詣者，即離於人我；窮盡法性者，則離於法我。是故一出離，直通於佛果；如上所言者，就出離言通。

如此大圓滿，向下亦能攝。初攝大印者：專心大圓滿，攝專一瑜伽；不著圓滿見，攝離戲瑜伽；事事大圓滿，攝一味瑜伽；大圓滿離修，攝無修瑜伽。次攝正分者：大圓滿明空，攝勝義光明；大圓滿如幻，攝幻身次第；明空無二體，大圓滿法身；明照不滅者，大圓滿報身；顯現種種者，大圓滿化身；此即身遠離；大圓滿智氣，即是語遠離；大圓滿智慧，即是意遠離；如上攝正分。大圓滿本具，即是大佛慢；念念大圓滿，即是大堅固；事事大圓滿，即是大明顯；此上攝起分。

大圓滿明空，即是大明點；大圓滿遍往，即是大中脈；大圓滿智慧，即是大智氣；此上攝氣功。心絕無明故，故能攝光明；一切如夢故，故能攝夢觀；法性絕中陰，又名大往生；六法皆攝盡，故名一能百。

不貪即佈施，無著即持戒，常空即忍辱，無間即精進，無亂即禪定，明空即般若；如是攝六度，詳見無上智。大圓滿同體，無自無衆生，亦能度衆生；大圓滿無緣，故能興大悲，而離於俗緣。具慈悲喜捨，能攝盡大乘；事事能無礙，處處自解脫，能攝十玄門；其餘十宗中，無不攝入者。廣則詳講錄，曾在樂山講，令彼道決定，極讚金剛乘；此中未暇詳，能攝小乘者。

大圓滿行人，外離於俗事，內離於俗念，密離於俗定，密密所離者，一切諸邊執。雖離無可離，實則爲大離；是故殊妙師，釋迦大牟尼，三時所說法，前後無顛倒。執此而破彼，是大愚癡行！執大不出離，尤爲愚中愚，是無可救者。於此通攝中，前後能通達，自與法相應。淺深自測量，不可妄尊大；惟不自欺者，方能救他人。丁亥十一月，圓滿三十日，座餘一小時，書此供黃老。

右頌爲黃蘗秋老居士而造，時同在菩提場中華佛寺閉關。括弧內二句，騰寫時所加。

四瑜伽證量相關頌

令彼具有覺受者，破疑徹底得了達，四瑜伽量之關係，造此說明其大要。惟祈自性大印智，自然流露大加持。初知大印無次第，次知證量有淺深；于不可思議之中，建立方便之證量。智者于彼四瑜伽，當知自性之自顯；切勿于彼文字上，生起摸索之執著。證量不離下四者，見修行果公認可：專一瑜伽以配修，離戲瑜伽究竟見，一味瑜伽以配行，無修瑜伽究竟果。言配爲就方便說，豈有不見而能修？專一瑜伽定明體，明體未離明體著，此見仍非究竟見；定于明體破定執，方得究竟見離戲。何以果位爲無修？豈因入無方爲果？爲其一味純熟故，無有修持之垢染。能于果上行一味，是即雙運無學位；是故一味究竟時，已入無修之階段。證量又有四自性：堅固自性爲專一，清淨自性爲離戲，解脫自性爲一味，圓成自性爲無修；四者具有連環性，非是劃然分四段。專一之中有離戲，即是專一清淨性；

專一之中有一味，即是專一解脫性；專一之中有無修，即是專一圓成性。離戲之中有專一，即是離戲堅固性；離戲之中有一味，即是離戲解脫性；離戲之中有無修，即是離戲圓成性。一味之中有專一，即是一味堅固性；一味之中有離戲，即是一味清淨性；一味之中有無修，即是一味圓成性。無修之中有專一，即是無修堅固性；無修之中有離戲，即是無修清淨性；無修之中有一味，即是無修解脫性。是故亦有諸行者，雖有一味之覺受，然無上品之專一，此即專一解脫性，未得圓成之專一。不可于證量生疑，明此亦不生慢心。無依無護寬坦去，無求自生而自顯。但得正見不動搖，修行不著亦不捨，果位深淺自生顯。己卯春王正月中，初九護法會供日，爲報諸大護法恩，于佛成道金剛座，書此願證佛法身，一切有情同壇成，同體大悲速顯現，報化功德悉具足。

右頌亦爲黃蘗老而造，時同在菩提場閉關。

勝照念王啟請頌

敬禮

上師自心大圓滿無分前

雙運忽散時，蜜仍在花枝，蜂其採矣，勝照其憶起！
希冀神通時，利他欲有期，力自充體，勝照其憶起！
情思暴流時，一往深且致，相知同裡，勝照其憶起！
一心作事時，猶恐有所遺，就在者裡，勝照其憶起！
平常無事時，枯禪如死尸，意態活矣，勝照其憶起！
貪境現前時，鐵屑猝遇磁，順勢入體，勝照其憶起！
瞋心激動時，怒氣不可支，直下契矣，勝照其憶起！
癡夢纏綿時，昏迷不覺知，忽然入理，勝照其憶起！
慢心高揚時，無佛無祖師，向上更履，勝照其憶起！

疑妒滋蔓時，鬼影如在茲，叩空而喜，勝照其憶起！
俗務叢脞時，五馬以分尸，還在者裡，勝照其憶起！
議論紛騰時，偏執而固持，谷響一理，勝照其憶起！
妙樂極盛時，屢戰屢敗之，禪契歡喜，勝照其憶起！
無念寂住時，明空無雲絲，鞭辟入裡，勝照其憶起！
法喜充滿時，歌舞以自恣，有以有以，勝照其憶起！
嬉笑遊戲時，意態各種姿，即此即此，勝照其憶起！
情景變動時，花樣翻新姿，別別入體，勝照其憶起！
八風吹動時，豈能無所思？內外雙履，勝照其憶起！

右頌爲趨入自心進詣瑜伽者或一味瑜伽者，最先學習而造；果已得一味之量，原用不著。大同禪師曰：
「智者擦着便提取。」何用如此瑣屑言之耶！時在乙酉三月，造于攸東天龍巖。

逆增上緣魔力加持頌

敬禮

金剛大勇心 敬禮

大悲觀世音菩薩摩訶薩 敬禮

大悲示現諸魔軍 敬禮

主宰三界魔軍大自在天

釋迦文佛聖教所指示，逆增上緣如拱雲托月，由彼加持激起金剛勇，敬禮魔軍逆加持成就。置之死地而生于憂患，疾風勁草儒家且讚歎，十無礙行古德嘗提倡，敬禮魔軍逆加持成就。聖經上帝亦發縱魔王，試探約伯以考其誠信，舜受堯帝二女之試驗，敬禮魔軍逆加持成就。能自反省因地之真實，毫不自欺捫心自檢討，由敬畏彼去黑生白法，敬禮魔軍逆加持成就。道上作障由我慢貢高，得少便足常自作聖解，

由摧毀彼能從歧路歸，敬禮魔軍逆加持成就。少分成就忘失無常心，障難不生健康起常見，由警醒彼將死于安樂，敬禮死魔逆加持成就。輾轉所生熾盛之煩惱，負薪救火終不能制伏，斬草除根令人修大印，敬禮煩惱魔逆緣成就。除身見執恆念有身苦，生起堅固金剛身行道，拚將無常換取光明藏，敬禮病魔逆加持成就。莊嚴佛果菩提心偉大，莊嚴大印金剛力偉大，莊嚴衆生真實信偉大，敬禮天魔逆加持成就。如分增長道高魔亦高，了知加持魔高道更進，如波推舟如風能助火，敬禮魔加持如量成就。凡夫日在魔中不自知，彼怯弱者畏魔勝于虎，由逢明師生起金剛勇，敬禮如量魔加持成就。諸佛大悲集中於觀音，各種逆順方便令成就，總爲開顯衆生本來佛，敬禮不違本旨魔加持。

民國戊子九月廿九造于北天竺仙境關房中

回向長壽偈

長壽願與健康合，健康願與功德合，功德願與事業合，如此長壽祈加持。

十速偈

速增諸行，圓滿大願；速以慈力，摧伏魔軍；
速隨勝解，出生神變；速與一切，佛母同事；
速以法光，照耀世間；速斷衆疑，令生歡喜；
速以本智，出生十力；速以方便，轉妙法輪；
速以妙言，淨諸世間；速就羣機，示佛依正。

人天資糧、往生資糧辨別頌

人天乘資糧，與往生資糧，最易相混淆；爲令生天者，能改變生西，造此辨別頌。惟上師彌陀，住頂加持之。十善與五戒，能守護不犯，人天乘資糧，根本即在此。此雖能通後，往生亦必具，然若止于此，則決難生西。欣厭必徹底，一心能不亂，信願行具足，如此條件具，方爲生西因。人天乘行者，與願西正士，用心有差別，不可不辨明。譬如行布施，惟憐貧者苦，欲令暫安樂，施以衣食住，此爲人天善；若于此施上，能知三輪空，能施與所施，施法三輪空，于此空性中，悲憫世間苦，雖亦施衣食，悲其具苦因，長劫自輪回，何時方出離，能知修淨土？此則願西者，悲心勝資糧。譬如救國家，惟緣本國苦，一切欲強國，利用我佛教；如日本佛教，已成國族化，明治維新後，爲令人口增，建立僧可娶；不以法救國，而以法遷就，如此之設施，

違法難生西；宰官所當知。或依世間法，改良衣食住，國強民富足，仁政佈天下，不擾亂他國，此係生天因，然非生西因，且非皈依法。皈依法宰官，惟信法救國，非世法可救；雖亦當調整，世間法安樂，然不止于此；必令全國衆，皆能行十善，切知娑婆苦，建立心淨土；令個個國民，皆知修淨業，成自性彌陀；雖處於五濁，心自生極樂；如此之行業，廣如李經說，自修勸他修，此則生西因。如本屬閑人，原無政治位，策己早成就，于經亦許可。一人得初地，世間得安樂，五穀能豐登，和平無戰爭；何況能成佛，所利更逾此。又如處家庭，爲父止於慈，此爲人天善，非是生西慈。彌陀雖慈悲，然非世間愛，愛染不教習；慈母多壞兒，世間且不許，何況出世間？于妻生貪染，於家常糾纏，十善且不具，生西安可能？故近事男女，雖處於家庭，雖能得和樂，然當知觀察，夫妻如冤家，子女如債主，家宅如牢獄，財物如桎梏，宿業所感召，今生當猛省，常生厭離心，不復再造業。苟難如維摩，處家無染污，則當善自處：離家入深山，深求淨土樂，

見佛悟無生，乘願回娑婆；此則方可云，生西勝資糧。若死於家庭，即此所愛者，成爲生西障；如五馬分尸，令不安詳逝。自心既常貪，家庭之安樂；于其臨終時，頓然以捨棄，自心必難忍，尚何暇存心，趨向于西方？遠行于異國，暫時愛別離，猶時觸境起，貪戀家國想；一旦永訣別，長劫不再見，如此臨終時，安得不留戀？一切生前時，所學往生法，及中陰修習，由有子女障，及死魔相擾，決定不能修。外氣才斷已，已活埋棺中，上七而下八，衣服重重纏，死亦不自在，更何能自修，到一心不亂？又世間順境，惟樂不厭離；於西方極樂，偶修不相續；權衡墮與生，墮分必居多。爲令生西力，加強勝于墮，則當常閉關，一心趨向之。世間安樂境，妙食與美衣，一切好受用，皆不生貪著；惟思淨土樂，與上善人俱，得不退轉位，如彌陀經載；一一常欣求。如久別遊子，欲入母懷中；雖遇七惡犬，圍吠于四方，我此欣求念，一刻不捨棄；此則願西者，應有之行持。一心之證德，更非容易事！嘗見某大德，曾閉九年關，專念彌陀佛，自云猶未證。

一心不亂德，當其顯現時，念佛三昧生，此則上上品；然非必如是，方可得往生。欣厭能徹底，亦可得往生。惟知其難證，益當早加鞭。密宗之頗瓦，即身成就法，非帶業往生，故尤難成就；苟無生西糧，雖具插草相，決定不往生，（關於遷識量，曾著論詳辨，見拙文集中。）

因果不亂故。十善人天乘，如塔之基礎；欣厭與一心，往生下三層；頗瓦則塔頂，非離彼基礎；空中起樓閣，惟是癡人夢！偶有出離念，而無出離行，欲據此偶然，了彼長劫業，何異以豚蹄，禳田求盈倉！故當常檢點，出離心切否？于世間諸法，厭離心一尺，往生得一尺；厭離心一丈，往生得一丈。十萬億佛土，由出離得到。因果必相當，如理善思維。淨業諸行人，通病在苟簡；他日出關時，造破苟簡論，此中未詳及。願具善心者，早生厭離心，乘此厭離心，得生極樂國。行者陳健民，土鼠年正月，將與蘅老別，孤身留印度，書此以贈之。

右頌為黃蘅秋老居士造，其中語多就彼私人言。

放生偈

放出生死涅槃外，還歸現成本地中，一放一切得全放，從無生生生佛同。^①

註釋：

①：無生，空性也。第二「生」字爲動詞。第三「生」字爲名詞，衆生也。

放生回向堅固住世偈

如少水魚深海去，願無常心常堅固；如負傷鹿深山去，願出離心常堅固；如羊斷索草中去，業繩解脫戒堅固；如鳥出籠空中去，執著解脫定堅固；如獅出樊山中去，無畏解脫慧堅固；願某某某^①長住世，如魚活躍覺海面，從勝光中起幻身，度盡四生無厭倦。

右二偈爲重慶居士林放生會造，時在癸未冬，閉關于樂山縣對河佛巖茅蓬，受黃欽哉老居士之函託也。
註釋：

①此處當以受回向者姓名取代「某某某」。

依誓回向頌

恩遍十方淨土契自心，現前我即蓮邦之天人；誓句所攝天人諸義利，
六通光明乃至無量壽，願垂加被現前賜成就。我承咐囑念念度衆生，
現前我即蓮邦之菩薩；誓句所攝菩薩功德聚，願垂加被現前賜成就。
三劫資糧發意頓圓成，住定見佛衆德自然生，聞名便得三昧三法忍，
受樂無染願速遇空行，氣功速證金剛堅固身，頓至補處無異觀世音；
尊已成佛誓句原不虛，願垂加被以我身印證。我依密宗東方金剛修，
曾歷多年無疑貳信心；上品願取無死虹光佛，中品願得肉身飛佛土，
下品示現無疾臨終時，願與東方主眷咸迎我，送妙喜國與佛水乳融；
此亦大慈本願祈加被，徹西徹東究竟大圓滿。

庚寅十月達於北天竺雲水茅蓬

註：旁批數目字即《阿彌陀佛願文》之條數。

常憶念頌

敬禮

無異蓮師貢噶根本上師前

不于有恩作酬報，不于放逸說正理，捨彼破戒不饒益，爲遵守故造此頌。
願上師垂賜加持，願本尊垂賜加持，願空行垂賜加持，願澄基兄常憶念！
衆生不知本來面，明力隨彼罪業行；具種再來以救護，宿生大願常憶念！
生老病死空流轉，解脫無期堪忍苦，業繩自牽到屠場，苦哉佛陀常憶念！
輪回隨心而顯現，癡念畜生善念人，何必閱彼人畜圖，捫心自問常憶念！
無始飄流無終去，一刀斬斷待何期？已入佛門猶難了，悲哉父母常憶念！
科學亦顯揚因果，三世即由此推論；科學難斷無中陰，一旦臨終常憶念！
親友財物捨棄時，中陰孤自飄零時，憶念昔作善惡時，有誰相救常憶念！
世間法律具條文，禮教亦有月旦評；業果是誰能逃脫？馬麥之報常憶念！

何日死來不可知，胎中死者豈無之？暫時且不應流轉，如救頭然常憶念！長于我者某已死，少於我者某亦亡；我何大幸得苟活，一刻千金常憶念！我今作佛依此身，我今造罪亦依此，大身小用且不宜，誤用自殺常憶念！一失足成千古恨，再回頭已百年身；少時相許今漸壯，莫再顛倒常憶念！世間功名與富貴，都是造罪之張本；無常業果金不換，莫待騎虎常憶念！世事惟是妄相續，榮枯枕上夢三更；了達纏幻莫非苦，趁未深入常憶念！病魔障難修始生，如滌溺器臭氣出；世間英雄苦中來，出世大勇常憶念！我願等同密勒願，我苦何似密勒苦？不經其苦惟空願，因果自考常憶念！出離之心如密否？信師之堅如密否？蓐麻受用如密否？因果相當常憶念！大苦大忍大凍餓，緣身猶被獵人欺；寧死不怨無加持，古今不及常憶念！米足多吉駐廐隅，勤修財神已見面，是日成就所得者，圓根蘿蔔常憶念！自心不生真懺悔，如乞丐唱蓮花落，真言十萬亦何益？午夜捫心常憶念！眠食放逸若干時，座上散亂若干時，纔得幾分住正念？好生慚愧常憶念！觀想明顯堅固否？淨信悲心相續否？發露懺悔懇到否？罪未全淨常憶念！

罪未及淨戒未得，戒不得時定難生；枯慧惟是口頭禪，知非自救常憶念！
 古德修習累多年，觀音示現鐵磨針，水滴石穿繩鋸木，恆毅一頌常憶念！
 前有累劫罪業集，後有無邊業暴流，大事豈易一旦了，雪山六年常憶念！
 因緣所生諸法相，欲得何果種何因，欲畏何果捨何因，操之在我常憶念！
 自離上師入火宅，到處惟結散亂緣；安得重回雪山修？死也清高常憶念！
 蓮師勝法如蛇喻，在彼竹筒惟上下；上則成佛下則墮，臨深履薄常憶念！
 密乘之道重上師，惟觀功德不觀過；觀德悲感觀過墮，善爲正觀常憶念！
 一切惟心師亦心，師如心鏡照自影；幾番見兄感師恩，今捨師去常憶念！
 己過如山積不見，師過秋毫亦明察；法不相應實由此，勤加懺悔常憶念！
 師本大悲觀世音，我未見時先已夢；灌頂殊勝相屢見，淨信相感常憶念！
 密勒背師得法後，法實相同修不應；回頭一經其師許，修無不應常憶念！
 達波問何時宏法？密云見師是佛時；因上果上唯靠師，淨信當具常憶念！
 米吉見師殺小蟲，淨信不生障無死；侍者信之比飛昇，信爲德本常憶念！
 業以自牽果自取，或成或墮總自心；大願已發大法得，大信大毅常憶念！

頓根即見即行果，證量具足非口頭；中根見到行未到，好自長養常憶念！
既說破後要跳過，口是心非徒自欺；狂慧惟是增上慢，仔細自檢常憶念！
知非便是大神通，守戒能生大功德；穀熟豈慮無糠粃，君子務本常憶念！
槍口莫向心外人，槍口向自心過殺；殺一分罪積分德，殺活同時常憶念！
知是救藥偏不飲，知是毒藥偏要嗜；此心如有老魔在，自殺自魔常憶念！
戒如地基成就本，空中豈能建華廈？百尺樓臺從地起，登高自卑常憶念！
有戒諸佛常護念，無戒惡友常聚合；戒以益我非惱我，莫錯看過常憶念！
好隱己惡則厭戒，好長己善則愛戒；親仇顛倒誰魔我，何日離魔常憶念！
守戒本當慎之始，如彼草鞋一經壞，泥沙垢穢任意行，險哉世路常憶念！
又如處女膜破後，後此不復有羞恥；當如守貞聖潔女，始終不破常憶念！
修法不應問自心，正行不應問加行，加行不應問戒行，戒犯當懺常憶念！
護法不應問自戒，本尊不應問自定，空行不應問明點，于師問信常憶念！
有諸內者形諸外，無諸內者徒攀外；天助自助西諺許，反求諸己常憶念！
信己心不可太强，盡己心不可太弱；自信有餘行不足，休責師友常憶念！

信師心不可不强，求師心不可太過，求而不得生毀謗，犯根本戒常憶念！不能受苦讀傳記，常以古人自砥礪；但將今人高自況，是被魔欺常憶念！密戒似在犯上守，密定似在活中死，密慧似以果爲因，稍錯便墮常憶念！學藝不成苦中苦，學佛不成苦中樂，有如甘蔗老來甜，耐到大樂常憶念！此身不向今生度，更向何生度此身？魔時但覺時日長，醒時苦短常憶念！爲山九仞虧一簣，止則吾止進吾進；欲進還止爲魔勝，徹底自省常憶念！吁嗟衆生惟是苦！學佛難成亦似苦；苦即退轉是真苦，爲兄悲淚常憶念！浪子回頭金不換，大樂原在兄心中，一篙恆毅到彼岸，同度父母常憶念！大恩門一切怙主，願光明體莫捨兄！大善逝一切如來，願金剛體莫捨兄！大空行一切佛母，願般若體莫捨兄！大智用一切護法，願解脫體莫捨兄！願以此勸告片善，回向法界諸含靈，罪淨障除菩提顯，大圓滿教日增長！

右頌發未爲張澄基兄造，時在樂山佛巖茅蓬閉關。

註釋：

①：唐英能照鏡光，見澄基兄爲蓮師化身。

②：（人畜圖）者，某屠夫死不斷氣，僧人來，舉一掌示敬，乃絕；死變豬，此掌如生前，圖上並載地址姓名。

③：澄基兄十五歲發心，即閉關廬山四十九天，余遇而獎勵之。

④：（恆毅頌）亦余所作，今不復憶矣！

⑤：事見拙撰《塔髮集》。

上師金剛持貢噶活佛啟請降誕頌

哀哉末世魔軍勢力強，金剛持師捨我返蓮邦；
依怙頓失門徒盡徬徨，日月雖經終不見智光。
得灌幾人續燈誰傳芳？度輪回衆大事待誰倡？
惟有啟請上師回道場，從速降誕哀求師中王！

尊脊上端十字杵印長，應表高壽何以速歸藏？
尊足龍獅是大弟子相，何以法燈無人續佛光？
大願大行此生未開張，應是弟子無福魔猖狂！
惟有啟請上師回道場，從速降誕哀求師中王！

第九無暇欲火鼎沸忙；同壇萬千幾箇住關房？
師本觀音大悲心未央，憫衆遇師闕修欠證量；
憤然善逝以身表無常，一旦魔消應許轉吉祥；
惟有啟請上師回道場，從速降誕哀求師中王！

邪說暴行雖蔓延東方，歐風美雨新薰如來藏，
相對名論接近我法幢，哲學大家引領咸瞻望；
誰堪主持全球大佛堂？迫不及待哀哉兩淚汪！

惟有啟請上師回道場，從速降誕哀求師中王！

蓮師懸記早經載典章，魔強苦深鐵鳥遍飛揚；此正是時密法可熾昌，
如彼油燈將乾忽閃光；佛芽新生上師豈可亡？待誰導引歧路之亡羊？
惟有啟請上師回道場，從速降誕哀求師中王！

天乎憶否勸佛降此方？地乎憫否大地久淪亡？勇父大誓應挽師慈航，
勇母大願應求師返鄉，修士大行應請師扶匡，衆生大苦應仰師救狂；
全體啟請上師回道場，從速降誕哀求師中王！

《海龍王經》攝頌

(有序)

《海龍王經》攝理高深，故能開慧，而文佛于此法會調和天、阿修羅，龍、金翅鳥之仇怨；誦之，八部皆大歡喜，故除障力宏。本人曾經天語勸請誦之。書肆無單行本。末世衆好簡易，經文甚長，因攝略成頌。乘船誦此更便。若居家易得《藏經》者，則以恭誦全經爲最妙。

佛在靈鷲會諸聖，空中忽見大寶蓋，衆珍雜珮垂瓔珞，無垢寶珠無量光，雨諸香花滿齊膝，虛空之中大雷鳴；目連尊者承佛旨，問此瑞應爲何由？佛告龍王將至此。少頃龍王率眷屬，並諸綵女供幢幡，繞佛七匝而讚歎：謂佛能了善惡趣，能察人根除衆暗；謂佛觀法無所有，幻化本空緣相與；曾行無限六度行，諸願圓成大聖雄。讚已請問菩薩行，如何離惡如何通？如何得入深要法？乃至如何受佛記？佛告四事離諸惡：無害大衆護十德，不說人短不輕慢，自省己過不訟彼。見如來得天眼通，合會說法天耳通，

自伏其心他心通，常習六念宿命通，棄諸貪濁神足通，遵修諸法無漏通。見身自然法自然，身入于淨法皆淨，見身無我法無我，觀自身空諸法空，己身無聲法如響，察身寂寞諸法寂，以我審諦觀法諦，以我志妙觀法妙，己身無聞法如聾，吾無所受不取法；如上十事入深法。四事得佛授記者，性情和順遵奉法，具足諸行觀白法，慧力能了一切心，了法本淨不生滅。龍王聞此獻衆寶，價值三千大千界，願得無礙佛光明，蒙光之人皆證覺。龍王復問六度智，佛謂手持慧劍行，佈施已等等于我，吾我已等等於人，人我已等等諸法，一切施已得佛等；持戒不依身口意，不依三世無內外，不依陰蓋不依覺，於法無依是持戒；忍辱不得人與我，不住我不住我所，淨人淨我與淨見，一切法淨是忍辱；於法無作不起滅，彼雖亂心心無執，本無之心各無實，觀須臾滅真忍辱；精進觀法不隨法，亦不捨法無積集，人法彼此不相離，如人自然我自然，諸法自然佛自然，解自然者無所得，求無所得真精進；禪定心原不在內，亦不在外識無住，於諸境界禪無著，等於本無而正受，禪定以智除塵勞，以禪化衆真禪定；智慧觀法常淡然，

不見諸法有歸趣，有見法而不觀者，不以見法而成觀，無求無曉無知見，悲憫衆愚真智慧。諸法法界與本淨，不可言說極深妙；四禪六度皆俗事，佛無心意識所念，無言無文真佛法，亦不著有言無言；文字言說亦佛法，忘於本淨得不亂，一切言教不可盡。佛告龍王總持藏，無盡之教爲總持；分別無盡慧無盡，明知無盡辯無盡。復有四力無盡藏：忍力忍一切所作，衆惡慧力除衆疑，通力見衆一切念，善權力應機說法。復有無畏無盡藏：不畏惡趣及衆會，不畏決疑及失道。文字緣會無盡藏：諸法惟陰而示現，蠲除五陰諸苦患；諸法虛空而示現，廣普之法不可盡；文字亦如諸法然，說時亦無所至到，不說亦不積在內；諸法緣對說果證，究於本法無果證，譬如諸法皆因字，諸行皆由於佛道。佛告龍王身總持：入諸法頂攝心面，觀法咽喉虛無脅，入深門臍次第脊，心清淨母方便父，法自在眷道支黨，佈施爲食忍莊嚴，精進成辦定飽滿，智度無極隨時順，住此總持入佛道。佛復爲龍說因緣：龍曾作無盡福王，佛曾爲梵首如來，彼時已爲說此法。總持章句六二事，不斷色行行無行，不色生行不色起，不色寂行如諦行，

色如本淨行色行，亦不念色本淨行，是爲相應總持門。舍利弗聞而問曰：如此總持爲龍說，何以人而未曾聞？佛曰莫輕視彼龍，迦葉佛時皆沙門，貪利輕戒墮龍中，當來爲佛如賢劫，淨土名曰無垢藏。龍問龍族何日增？佛告破戒比丘多，惡行居士亦復然，戒律不具當墮獄，不捨直見轉入龍。龍子威首乃發願，願行總持不忘本；佛爲授記慧見佛，淨土之名曰淨住。海龍王請佛赴海，蒙佛嘿許乃返宮。會集諸龍及諸神，並邀帝釋及諸天，變化無量大宮殿；如佛由忸利天下，變化下海衆寶階；六萬龍王皆來迎，十方佛土亦現前，無量天神來讚歎。佛爲衆說十善德，人天二乘佛之本，除得世間共德外，依如來慧亦證覺。不殺得佛壽自在，不盜得佛大神通，不淫得佛馬陰藏，不妄語得佛至誠，不兩舌得離魔眷，不惡口得聲超梵，不綺語得佛授記，不貪得佛三界供，不恚得佛覺無厭，不癡速得佛果位；即此十善行六度，疾得圓滿菩薩行。又云三法除罪障：入因緣慧具悅心，依本淨法知本無。龍王復問至超異，佛曰十事至超異：常念歡悅性清淨，善權方便常精進，觀察人物無緣悲，修德無厭好博聞，行不放逸念道場，

得佛慧不捨道心。燕居無善神問佛：菩薩云何意無極？佛云其心極清淨，所住中間無厭倦，志於深法了本空，如是四事意無極。燕居乃發大志願，佛爲授記當成佛，其佛名曰帝幡幢。無焚龍王恭問佛：無人無我誰受記？佛言如是無所住，了空無我即受記。如來者了於本無，住本無故而不動，解了本空即如來，諸法如是本無住，是爲如來等住地。海龍王女號寶錦，供佛瓔珞發道意，自謂來世亦作佛。迦葉則曰女不成。女曰成佛如反掌，男女之身不可得，身心自然成佛道，吾即道不以道成。迦曰何不轉法輪？女曰現前即法輪，轉無著輪空無輪，轉無二輪清淨輪，輪既如是何所轉？佛稱善哉授女記，其名曰普世如來。帝釋白佛請和解，無善神亂忸利天。佛乃勸告無善神，仁慈之心佛所讚，今世豪貴不久長，常觀後世離怨對。無善神乃發宏誓：永如親友離鬥爭。佛乃三稱曰善哉！是爲第一供養佛。龍王迎佛及聞決，數次供佛值全球，佛不爲此稱善哉；發誓仁慈阿修羅，佛稱第一大供養。時海中有四龍王，喻氣大喻氣熊羆，及無量色白世尊：如何軟化金翅鳥？佛脫袈裟命分存。龍王主眷慮不敷，然隨所欲皆得分。

海龍王告諸龍族，當敬此衣如塔寺。佛復爲彼諸龍族，一一授記當作佛。四金翅鳥乃問佛：以後當以何爲食？佛言殺生與劫奪，欺詐冒濫四種食，皆墮惡趣不得食，除此則可當慎擇。四金翅鳥旋發願，向龍長行無畏施。佛爲彼等說宿因：金仁佛時爲比丘，其名欣樂大欣樂，上勝上友皆貪供，以供佛故得免獄；應時四鳥現宿命，宿作罪福悉現前；佛前懺悔不再犯，佛爲授記得度時，爲彌勒佛第一會。龍族免難因求佛，入海涅槃奉舍利。須菩提聞制止之。諸龍則曰如來身，無窮無極不可限。須因嘿然佛稱善，如來之身無遠近。佛教化畢乃出海，光耀海神求莊校。佛言十善即莊校，授記彼將轉男身，生於無怒佛土國，蒙彼佛陀得授記。龍王之子名受現，化作大殿如忸利，送佛返於靈鷲山。龍王父子問大供，佛告四事爲大供：不捨道心植德本，心具大樂集慧品，建大精進嚴佛土，入深妙法得法忍。時王舍城君與臣，皆來山中表歡迎，並問何故水已枯，世間唯見天宮殿？佛曰如來之自在，令陸見殿海見水。王問海王有何因？佛曰曾作轉輪王，承事淨光照耀佛；夢中忽聞天語偈，憫衆當發菩提心，是爲第一供養佛；

當來成佛之佛名，無垢德超諸王佛。時王乃賀海龍王；龍王答曰法無記；由佛大悲所示現，乃隨習俗示授記；諸法究竟無法界，亦無授記亦無成。龍王說此法語時，二萬菩薩得法忍。龍王踊空偈讚佛：一切諸法本無心，亦無有作無無作，罪似有緣無受者，佛說法因空如響。佛乃以經囑大士，二萬菩薩一萬天，皆誓流佈普遠近。慧英幢菩薩白佛：隱省諸法無所持，寧能彷彿持道否？佛云如斯正應持。乃至無垢光女曰：人法佛法皆不想，寧能彷彿持道否？佛云如斯正應持。佛乃宣說除障咒。普首天發願護持；伏魔化外此經勝。佛復囑咐於阿難：末世誦此大吉祥，能勝魔軍離障蓋，常得龍天之擁護，疾證無上大菩提，廣度無邊諸有情。

癸巳七月初一造於北天竺五槐芽蓬

諸天讚

(行者用)

敬禮

本師釋迦牟尼佛 敬禮

護持佛法諸天尊

本師文佛親口宣：自兜率天生閻浮，出家降魔轉法輪，諸天讚助無厭倦。希有世尊難逢遇，最初勸請降誕者，無上大恩是天尊！伎樂八萬四千音，聲聲勸請佛降生；勿忘我等可憫衆，捧鉢四天請降生；佛聞此音乃受請，無上大恩是諸天！佛生一十二年前，淨居天尊先佛來，示婆羅門宣預言：謂有佛祖當降生。勝族選擇卅二德，智幢天尊所請問；如白象形下閻浮勝光天尊所建議。下時諸天皆會集：四天及釋提桓因，夜摩天兜率陀天，樂變化天他化天，娑婆界主梵天王，梵衆天與梵輔天，妙光天與少光天，光嚴天與淨居天，以及阿迦尼吒天，摩醯首羅及餘天，捨棄諸禪三昧樂，

從誕乃至於涅槃，常持淨心以侍佛。末世福薄聖賢少，具願菩薩應化者，願如請佛之故事，速請多請我啟請。末世縱有聖賢生，染污緣多難清淨；願如侍佛之故事，密密將護我啟請。

佛既入胎淨居天，於佛父王現半身，說偈爲報希有事；夜摩天等現妙宮，以爲聖后之所居。佛既誕已諸天女，各捧妙油浴聖母，供佛天衣與寶具。梵王帝釋乃變化，極端正摩那婆身，演吉祥微妙讚詞；摩醯首羅與淨居，設大供養來慶賀。佛由生處入宮中，天女或持孔雀傘，或灑香水道路中，或執寶花或瓔珞，各類各五十萬女；色界諸天持寶幡，欲界諸天持寶蓋，如雲佈滿於虛空。佛配妃後處深宮，諸天說偈勸出家；兜率天名應出家，飛至殿上誦妙偈，讚歎出家勝功德，並感宮中諸樂器，不奏自鳴勸出家。佛遊四門以觀察，淨居天尊於東門，化作老人以感佛，於南化作多病人，於西化作已死人，於北化作大比丘，爲佛正說出家法。佛乃告父求出家。父王簡練勇猛士，晝夜戒備於內外；重門一響驚十里，無天之助何能越？

藥叉大將二十八，毗沙門宮共候命；淨慧天尊施神力，令諸勇士悉昏睡；莊嚴遊戲天尊者，令諸象馬皆寂眠；嚴慧天尊施神力，於虛空界佈寶路；法行天尊施神力，令彼宮女變壞相；開發天尊施神力，令佛中夜忽獨醒；釋提桓因示道路，弗沙星與月合時，佛於中夜果醒起，安詳而出合掌立，正念十方一切佛。四天各領天衆來，釋提桓因立虛空，諸天同時大聲請，此正是時速出家！車匿既牽乾陟到，昇虛而行六震動，宮內外衆皆不知。夜裡經行六由旬；既至仙人苦行林，別車匿與乾陟後，孤身遠離華貴地，空林唯天最可親！當時誰人解事佛？替人事佛謝諸天。知佛嫌衣驕奢耶，淨居天尊供袈裟；佛乃自稱真出家。末世善根難培養，貪著五欲難出離；或以淺根希深行，冒充菩薩不出離；或雖出家入於廟，統衆大早不修行。如是離家復離廟，雙重出離勝妙器，願諸天尊嘿護佑，如護文佛真出家。

佛六年苦修禪定，日食一米一麻耳；常爲天衆所護持，波旬伺過不可得。善生女欲供梵志，淨居天遮梵志身；善生唯見文佛在，供吉祥相之乳糜。

赴菩提場金剛座，十六天尊守此場，其名曰轉進天尊、無勝天尊施與天、愛敬天尊勇力天、善往天尊持地天、作光天尊無垢天、法自在天法幢天、行吉祥天無礙天、大莊嚴天淨戒天、蓮花光明十六天，皆曾得不退轉位，常時竭誠護道場。帝釋復化作刈人，供吉祥草爲佛墊；大梵天王廣陳供，珍寶無量遍虛空。佛既入座發宏誓。六欲諸天東南住，防護障難恭而謹；四維上下皆有天，圍繞恭敬以防護。波旬統率魔男女，威迫媚誘逞所能；淨居天尊申警誡。無數諸天散天花，讚歎佛不爲魔動。既成正覺現瑞相，諸天歡喜獻衆寶，天女各唱讚美詞，淨居讚後遍光讚，梵天讚後他化讚，化樂讚後兜率讚，帝釋讚後四天讚，並申無量廣大供。末世修行障難多，行者多欲魔得便；邪說王難攻其外，苦病疑心攻其內；五陰熾盛不易除，證量淵微不易達；修者如毛成如角，諸天見之寧不憫？如護文佛圓滿果，願諸天尊勤將護，令諸行者離魔障，生圓次第疾證成，六通十力皆具足，顯著金剛道果德。

佛證果後嘿然住，波旬竟敢勸涅槃。螺髻梵王娑婆主，爲我苦衆勸請佛，三勸三請轉法輪。當日懵懂之人類，誰解如天王勸請？於今人間有佛法，飲水思源謝天恩！佛既許可轉法輪，菩提樹守者四天，受法光明與樂法，法行四天復請問：當於何處初轉輪？欲色二界諸天衆，各將寶幢與寶蓋，爲佛嚴淨鹿野苑；八萬四千寶獅座，佛合爲一坐傳法。佛度比丘五尊已，爲度迦葉十八變：帝釋聽經顯光明；佛受供已欲澡洗，帝釋指地而成池；佛欲浣衣帝釋知，爲取四方大好石；佛欲曬衣帝釋知，復取六方石備用。其後各處轉法輪，或上於天或下海，乃至涅槃於雙林，諸天無時無方所，不爲文佛之侍衛。末世魔軍勢力強，處處道場多障礙，國王宰官多邪見；博學之士偶得信，亦少如法而修行；間有成德之志士，欲建無上大法幢，財力人力每不足。願天回憶文佛事，曾費幾多維護力；如今縷縷一線法，如是法脈極珍貴！當超護持文佛力，倍加努力咸擁護，令其大願成德士，壽長福多權威大，得續文佛大事業，重興廣大佛法幢。密密將護我啟請！

癸巳秋陳健民撰于西竺茅蓬

諸天讚

(寺廟用)

敬禮

本師釋迦牟尼佛 敬禮

護持佛法諸天尊

本師文佛親口宣：自兜率天生閻浮，出家降魔轉法輪，諸天讚助無厭倦。希有世尊難逢遇，最初勸請降誕者，無上大恩是天尊！伎樂八萬四千音，聲聲勸請佛降生；勿忘我等可憫衆，捧鉢四天請降生；佛聞此音乃受請，無上大恩是諸天！佛生一十二年前，淨居天尊先佛來，示婆羅門宣預言：謂有佛祖當降生。勝族選擇卅二德，智幢天尊所請問；如白象形下閻浮，勝光天尊所建議。下時諸天皆會集：四天及釋提桓因，夜摩天兜率陀天，樂變化天他化天，娑婆界主梵天王，梵衆天與梵輔天，妙光天與少光天，光嚴天與淨居天，以及阿迦尼吒天，摩醯首羅及餘天，捨棄諸禪三昧樂，從誕乃至於涅槃，常持淨心以待佛。末世福薄聖賢少，具願菩薩應化者，

願如請佛之故事，速請多請我啟請。末世縱有聖賢生，染污緣多難清淨；願如侍佛之故事，密密將護我啟請。

佛既入胎淨居天，於佛父王現半身，說偈爲報希有事；夜摩天等現妙宮，以爲聖后之所居。佛既誕已諸天女，各捧妙油浴聖母，供佛天衣與寶具。梵天帝釋乃變化，極端正摩那婆身，演吉祥微妙讚詞；摩醯首羅與淨居，設大供養來慶賀。佛由生處入宮中，天女或持孔雀傘，或灑香水道路中，或執寶花或瓔珞，各類各五十萬女；色界諸天持寶幡，欲界諸天持寶蓋，如雲佈滿於虛空。佛配妃後處深宮，諸天說偈勸出家；兜率天名應出家，飛至殿上誦妙偈，讚歎出家勝功德，並感宮中諸樂器，不奏自鳴勸出家。佛遊四門以觀察，淨居天尊於東門，化作老人以感佛，於南化作多病人，於西化作已死人，於北化作大比丘，爲佛正說出家法。佛乃告父求出家。父王簡練勇猛士，晝夜戒備於內外；重門一響驚十里，無天之助何能越？藥叉大將二十八，毗沙門宮共候命；淨慧天尊施神力，令諸勇士悉昏睡；

莊嚴遊戲天尊者，令諸象馬皆寂眠；嚴慧天尊施神力，於虛空界佈寶路；法行天尊施神力，令彼宮女變壞相；開發天尊施神力，令佛中夜忽獨醒；釋提桓因示道路，弗沙星與月合時，佛於中夜果醒起，安詳而出合掌立，正念十方一切佛。四天各領天衆來，釋提桓因立虛空，諸天同時大聲請，此正是時速出家！車匿既牽乾陟到，昇虛而行六震動，宮內外衆皆不知。夜裡經行六由旬；既至仙人苦行林，別車匿與乾陟後，孤身遠離華貴地，空林唯天最可親！當時誰人解事佛？替人事佛謝諸天。知佛嫌衣驕奢耶，淨居天尊供袈裟；佛乃自稱真出家。末世善根難培養，貪著五欲難出離；或以淺根希深行，冒充菩薩不出離；或雖出家入於廟，統衆大早不修行。入已如教守戒者，雙重出離勝妙器，願諸天尊嘿護佑，如護文佛真出家。

佛六年苦修禪定，日食一米一麻耳；常爲天衆所護持，波旬伺過不可得。善生女欲供梵志，淨居天遮梵志身；善生唯見文佛在，供吉祥相之乳糜。赴菩提場金剛座，十六天尊守此場，其名曰轉進天尊、無勝天尊施與天、

愛敬天尊勇力天、善往天尊持地天、作光天尊無垢天、法自在天法幢天、行吉祥天無礙天、大莊嚴天淨戒天、蓮花光明十六天，皆曾得不退轉位，常時竭誠護道場。帝釋復化作刈人，供吉祥草爲佛墊；大梵天王廣陳供，珍寶無量遍虛空。佛既入座發宏誓。六欲諸天東南住，防護障難恭而謹；四維上下皆有天，圍繞恭敬以防護。波旬統率魔男女，威迫媚誘逞所能；淨居天尊申警誡。無數諸天散天花，讚歎佛不爲魔動。既成正覺現瑞相，諸天歡喜獻衆寶，天女各唱讚美詞，淨居讚後遍光讚，梵天讚後他化讚，化樂讚後兜率讚，帝釋讚後四天讚，並申無量廣大供。末世修行障難多，行者多欲魔得便；邪說王難攻其外，苦病疑心攻其內；五陰熾盛不易除，證量淵微不易達；修者如毛成如角，諸天見之寧不憫？如護文佛圓滿果，願諸天尊勤將護，令諸行者能安住，如教如法疾證成，六通十力皆具足，顯著菩提道果德。

佛證果後嘿然住，波旬竟敢勸涅槃。螺髻梵王娑婆主，爲我苦衆勸請佛，

三勸三請轉法輪。當日懵懂之人類，誰解如天王勸請？於今人間有佛法，飲水思源謝天恩！佛既許可轉法輪，菩提樹守者四天，受法光明與樂法，法行四天復請問：當於何處初轉輪？欲色二界諸天衆，各將寶幢與寶蓋，爲佛嚴淨鹿野苑；八萬四千寶獅座，佛合爲一坐傳法。佛度比丘五尊已，爲度迦葉十八變；帝釋聽經顯光明；佛受供已欲澡洗，帝釋指地而成池；佛欲浣衣帝釋知，爲取四方大好石；佛欲曬衣帝釋知，復取六方石備用。其後各處轉法輪，或上於天或下海，乃至涅槃於雙林，諸天無時無方所，不爲文佛之侍衛。末世魔軍勢力強，處處道場多障礙，國王宰官多邪見；博學之士偶得信，亦少如法而修行；所有已開之寺宇，欲建無上大法幢，財力人力每不足。願天回憶文佛事，曾費幾多維護力；如今縷縷一線法，如是法脈極珍貴！當超護持文佛力，倍加努力咸擁護，令具大願弘法者，壽長福多權威大，得續文佛大事業，重興廣大佛法幢。密密將護我啟請！密密將護我啟請！

癸巳秋陳健民撰于西竺茅蓬，初稿爲行者，今改爲寺用。癸亥夏。

寄語冗冗人

叮嚀再三讀

